

## **Uru ngai etikirighi ghe lao sio ta aHibru etoa Inangari emuemua**

Karika ita kilakila va see ghe pitila ia oia uru ngai etikirighi, me karika ita kilakila va see ila lo atoa laghe ghaaiela, me tee karika ita kilakila va poli saa me ghe pitiela. Oroi inangari etana eauliaa aleira ale manga aJiu etoa me niaiaavusu-vusuena atoa, liuna avalua o me oroi ila lo atoa la aikaaiaa va lo atoa laghe ghaaiela aJiu ila.

Lo ateva ghe pitiela ghe auliaala vaalua Iesu me ouna ateva niaulia ngaitauaa elaulau pokane ateva niaulia ngaitauaa, Moses, me ensolo atoa. Ghe auliaa kieira va la rau mene oghi vulu aaiesoaira tale maamasinaane God. Tale airu-uruu etoa sapta, ghe aulia ngakorokorongana etaira va la tingina asarasarakana arongona ta mene katoa la tau lao nimmarikana, me ghe auliaala lo atoa uneira niaiesoaa namungaili, me tani aimuli tee Iesu me tani poso parasi tale niaiesoaa.

### **Tani kila amuemua**

Aitiutiu tale inangari: Airuuruu eteva inangarina God, Natuna ia *1:1-4*

Natuna God elaulau ensolo atoa *1:5-2:18*

Niaulia ngatootoonga tale uunguaa nitam aiesoaa *3:1-4:13*

Natuna God namuu ia tale pristi ekapa atoa *4:14-7:28*

Niaiaavusuvusuena kannu ia Iesu *8:1-10:18*

Am mae akalakalangina ta God *10:19-25*

Am tingina akorokorongana tale nimmarikana  
*10:26–12:29*  
 Nilooloo sae, nimasimasi me airuuruu *13:1-25*

*Natuna ateva God, emuemuaa ensolo atoa*

<sup>1</sup> Emua arau, God ghe aappooaa tee kateva kateva tale propete atoa tale oroi ase salana,\* me ghe gheleilala va la ghaulaa inangarina ta tuvuita atoa. <sup>2</sup> Me isaa oia tale airuuruu tale nau, God ghe aappooaa teitala ta Natuna. Ta ngetana God ghe gheleila kosa ateva, me ia God ghe suiela va aue eghaa voto akapaaili. <sup>3</sup> Eaapasunga naanamungaane ateva God, me ia nim nonginaaili Tamane. Me tale inangarina ateva sarasarakanaaili ia, esuusuei voto akapaaili tale kosa ateva tani toka. Nau ghe ruula uunguaa tani ghelei salana atikirighi tani ghelei erarangisanaila tale kaluira ssavoto, ghe toka siola epona liu, tale pai muenna ativilau ta lo ateva sarakanaaili ia me iaaili epona, eaaimatoonga va matuutuliena ia. <sup>4</sup> Me ia God ghe anamunamunganeila ta ensolo atoa, nim nongina ararina atea God ghe taue lao sio etana namungaili ia ta ensolo atoa.

<sup>5</sup> Poli God karika ghe ue ta teva ta kapuna ensolo atoa va,  
 “Io natughi io,  
 ghaine nge tamam ieghila.”

---

\* **1:1:** Katoa tau ngalomasaanga la annaa va malloeana isaa avalua toko va God ghe aappooaa tale propete atoa tale oroi ase salana tale oroi nau. **1:2:** Jon 1:3. **1:3:** Jon 14:9; Kol 1:20; Hib 8:1. **1:4:** Plp 2:9. **1:5:** Sams 2:7; Apos 13:33; 2 Sam 7:14; 1 Kro 17:13.

Me tee, karika God ghe uela ta teva ensolo va,  
 “Aue tamana etaghi,  
 me ia aue natughu ia.”

<sup>6</sup> Ta nau God ghe maeaa sio natuna mua ateva tale  
 kosa ateva, ghe uela va,  
 “Ila akapa kapuna ensolo atoa God la tani  
 kkaueinia.”

<sup>7</sup> Me tani auliaa ensolo atoa, God ghe uela va,  
 “Egheelei kapuna ensolo atoa va ila kuukuu ila  
 me kapuna tau ngai nongonongo anna atoa  
 la kura ramerame.”

<sup>8</sup> Me tani auliaa Natuna ateva, ghe uela va,  
 “God, aitokatokam ateva aue etoka liu.  
 Uaaitoiaa kapum taumattu ngatoa tale  
 nighulughuluena.

<sup>9</sup> Uaailousiaa saa voto ghulughuluena, me usessa  
 tee voto sesa,  
 liuna avalua o me God, kapum Goto ateva ghe  
 suitoongainiola,  
 me ghe ghelei emasimaseiiliola, me masi-  
 masiaam elaulau mene katoa kapum.”

<sup>10</sup> Ghe mene uela va,  
 “Vau palepale, io ughe gheleila kosa ateva tale  
 aitiutiu,  
 me ughe gheleila epona liu ta nimam.

<sup>11</sup> Aue la kapa, me io aue utoka.  
 Aue la poka nongina koloso aiaasae.

<sup>12</sup> Aue ughoula nongina koloso aiaasae pokane,  
 la aaikolikoliaa tani ghaa velu pokane  
 aiaasae me tani asae ouna,  
 me io karika aue uaikolikoliaa,

me maamauluaam, karika airuuruu etana.”

<sup>13</sup> Me God karika ghe ue ta teva ta ensolo atoa va,  
“Toka siola tale pai muenna ativilau,  
lomosina ta aghatoka sio lo atoa la sessa teeio euu  
me uatingina saooa kkem etaira.”

<sup>14</sup> Me ensolo atoa saa ila? Ila spiriti ila la uungu  
ta God me esungisungila tani sausi lo atoa aue la  
ghaa niasaangi.

## 2

### *Salana atikirighi tani saanga*

<sup>1</sup> Isaa avalua o me ita tani ailokoia ngamasina  
sa ateva ngita ghe nongoala, me karika aue ita  
mene tiu ppae tale inangari koronna. <sup>2</sup> Poli  
marova inangari ensolo atoa laghe auliaala eaa-  
pasunga va koronna, me see etam nongo usilaa  
me etam aimuli tee aue eghaa sesa aipolipoli,  
<sup>3</sup> vaalua aue ita ttiuaa sesa aipolipoli, marova ita  
rati ia o paka niasaangi eteva? Ia oia niasaangi  
eteva, Vau eteva ghe aitiutiula tani aulia ngaotua,  
me lo atoa laghe nongola Vau eteva, laghe auli-  
aala etaita va koronna ia. <sup>4</sup> God tee ghe apasunga  
ngaotula tale niamatootoongana, asease mirikol,  
me voto Spirit Manga kannaa ghe nim koitaala,  
tale aaloannaane.

### *Iesu ghe taumattula tani sausita*

<sup>5</sup> God karika ghe suila ensolo atoa va la toi ouna  
ateva kosa tani mae, ia oia ami aaulieinia. <sup>6</sup> Me  
tale kateva voto, kateva ghe pitila tani ue va,

---

**1:13:** Sams 110:1.   **1:14:** Sams 34:7; 91:11.   **2:2:** Gal 3:19.  
**2:3:** Hib 10:29; 12:25.   **2:4:** Mak 16:20; 1 Ko 12:4, 11.   **2:6:**  
Sams 8:4-6.

“Saa taumattu ila me unannangailiila?

Vaalua me uaitaraa nim taumattu ngatoa?

<sup>7</sup> Ughe gheleilala, tale tukuna nau, ila euu\* ta ensolo atoa

me ughe anamunamungainilala tale nio-  
neoneaa.

<sup>8</sup> Me ughe atoka akapala voto va la aitaraa.”

God ghe tau ekapa lao sio voto, karika ghe ghaa oghila righi, me tale isaa oia nau karika ita taatara va voto akapa etokatoka tale aaitaraaira.

<sup>9</sup> Ta ita tara lo ateva ghe gheleila ghe siola euu ta ensolo atoa, Iesu etana. Me nau ghaine, God ghe anamungainiela tale nioneoneaa, poli ghe ghaala nimmarikana tale nimate mausiita, liuna avalua o me tale maamasinaane ateva God ghe lao sio tale nimate mausi taumattu ngakapa atoa.

<sup>10</sup> God ghe gheleila voto akapaaili, me isaa akapa o voto ghe gheleila tani asaesae ararina atae, poli emaamasina va emaeaa oroi natuna epona liu tani toka teeia, liuna avalua o me ghe gheleila Iesu va eruu uunguaane tale nimmarikana, tani muemuaa taumattu ngatoa tani saanga. <sup>11</sup> Iesu me taumattu ngatoa egheelei emangaila, kateva nonga tamaira, liuna avalua o me Iesu karika epaapalata tani kolola va nengane

ila. <sup>12</sup> Eue va,  
“Aue aghaulia ngaotu uunguaane ta kapughu efoa.

Me emua ta mataira, aue akkinari tani tau sae ararim atae.”

<sup>13</sup> Me emene ue va,

---

\* **2:7:** Ughe gheleilala, tale tukuna nau, ila euu o Ughe gheleilala mala euu. **2:9:** Plp 2:8-9. **2:11:** Mat 25:40. **2:12:** Sams 22:22. **2:13:** Ais 8:17-18.

“Aue aghatoka tuutulighi ta God.”

Me emene ue va,

“Aghi toko, tee me natughu etoa, God ghe taula mae sio etaghi.”

<sup>14</sup> Poli aliki etoa nim taumattu ila tale malatau me rae, Iesu ghe ia avaluela o. Liuna avalua o me tale matemateane ia aue eroo tani turungi raroai eteva, ia euunusi sarasarakaniaa nimate.

<sup>15</sup> Me aue esaangi lo atoa la maamatauta nimate atea tale maamauluaaira, nonginaaili va lo atoa la tokatoka tale karavusu. <sup>16</sup> Poli koronnaaili Iesu karika ghe sausila ensolo atoa ta tuvuna atoa Abraham. <sup>17</sup> Malloeane avalua o me Iesu, God ghe gheleila nongina kapuna atoa tale isaa akapa salana, me aue eroo tani nongina pristi eteva namuu ia, me aue ealousiusi tee taumattu me aue eruu niuungu God ghe tau lao sio etana, tani ghelei salana va God aue eroo tani kkaluaa kaluira ssavoto taumattu ngatoa. <sup>18</sup> Poli ghe ghaala nitootoonga, me nimmarikana ghe mae sio etana, isaa avalua o me ia eroo tani sausi lo atoa nitootoonga emaemae etaira.

### 3

#### *Iesu namuu ia ta Moses*

<sup>1</sup> Liuna avalua o me, kapughu etoa am manga am, me am tee elome tale nikolokolo ngepona liu eteae, aghaloanna va am atoka nannaaimim ta Iesu, Apostolo ia me namuu ia ta pristi etoa, ia o ita aaulia ngaotua. <sup>2</sup> Ghe ghelei emasinaaili uunguaane lo ateva ghe suiematoongainiela, nongina

Moses ghe gheelei emasina uunguaane elome ta kapuna taumattu ngatoa God. <sup>3</sup> Nioneoneaa ta Iesu isaa epona ta Moses nongina lo ateva eatuutulu ale ateva eghaaghaa nioneoneaa isaa epona tale ale ateva eatuutulua. <sup>4</sup> Ta ale akapa tau ngai atuluna manee, me God ghe gheleila isaa akapa voto. <sup>5</sup> Moses ghe gheelei emasinaaali uunguaane nau ghe tau ngai uungula ta kapuna taumattu ngatoa God, ghe aaulia ngaotu sa ateva God aue eaulieinia tale nau too emaemae. <sup>6</sup> Me Karisto Natuna ia God, me ghe aaitara ngamasina alena ateva God. Me ita alena ita God, arova ita sarasarakana tani tingina akorokorongana, me ita poso parasi tale uneita niaruaa tale voto ita taatara lao emua me karika ita ghe ghaa.

*Niaulia ngatootoonga tale uunguaa nitam aaiesoaa*

<sup>7</sup> Liuna avalua o me, nongina Spirit Manga ateva eue va,

“Ghaine, arova am nongo lingi ngalona ateva,

<sup>8</sup> am rou mene akorokorongana urunguitanimim

nongina am ghe sassakeaa

nau nitootoonga tale voto ateva karika righi taumattu etana,

<sup>9</sup> tale ia o voto ateva tuvuim atoa laghe tootoon-gainaghila tale nitootoonga,

me ghaatingauluae (40) ninamanama laghe tarala sa ateva aghe gheleieila.

<sup>10</sup> Liuna avalua o me ghe sessaieghila tale ia o vituu eteva,

---

**3:5:** Nam 12:7; Diut 18:15-19.    **3:7:** Sams 95:7-11.    **3:8:** Eks 17:7; Nam 20:2-5.

me aghe uela va, ‘Urunguitaniira etiutiu ppae nonga,  
me karika la kilakila salaghi.’

**11** Liuna avalua o me tale sessaiaaghi aghe aulia ngaotula tale inangari nialokoi va karika poi aue la kupi sso tale uneghi niainoana.”

**12** Am tani taatara amasina, kapughu etoa, va karika teva etaimim emene tau velu urunguitaniina ateva va esesa me karika eaiesoaa me eliuliu vilina ta God ateva tokatoka liu ia. **13** Ta am asarasarakana kateva kateva etaimim nau ekapa atoa, tale nau etiulu oia ita aseasea va “Ghaine,” poli aghaaloanna va kamekameaa ssavoto ateva karika emene akorokorongana urunguitanimim. **14** Poli angita ghe aikapukapuaa teela Karisto arova ita poso parasi tale kaluita niaikaiaa, tale voto ita ghe ghaa akasinala, lomosina ta elaa ghaa airuuruu tale voto akapa. **15** Nongina eauliaa va, “Ghaine, arova am nongo lingi ngalona ateva, am rou mene akorokorongana urunguitanimim nongina am ghe sassakeaa.”

**16** See ila lo atoa laghe nongola me laghe sassakeaa? Am roo tani kila va ila o lo atoa Moses ghe katulaa vellala eljip. **17** Me ghe sessaie la ta see atoa ta ghaatingauluae (40) ninamanama? Am roo tani kila va ta lo atoa laghe gheleila ssavoto me laghe matela me vilikiira ghe asola tale voto ateva karika righi taumattu etana. **18** Me ta see atoa God ghe gheleila inangari nialokoi va karika

---

**3:11:** Nam 14:21-23.    **3:15:** Hib 3:7-8.    **3:16:** Nam 14:1-35.  
**3:17:** 1 Ko 10:10.



la mene kupi sso tale unna niainoana? Lo atoa karika laghe nongo usilaala. <sup>19</sup> Liuna avalua o me ita taatara va karika laghe roola tani kupi sso poli karika laghe aaiesoaa.

## 4

*Niainoana nongina nau manga ateva ta kapuna taumattu ngatoa God*

<sup>1</sup> Liuna avalua o me God ghe auliaala inangari nialokoi tale nau niainoana ateva, me ia o inangari nialokoi eteva karika ghe ruu, ita tani anna ngamasina va teva etaita erau tam kupi sso. <sup>2</sup> Poli ngita ghe ghaala masi kiukiu laghe ppoaala etaita nongina aIsraeli etoa tee laghe ghaala ta Moses. Me inangari laghe nongola, karika ghe alutula righi masi voto etaira. Poli lo atoa laghe nongola karika laghe aikaia ngaitauaa teela lo atoa la ghe nongo usilaala. <sup>3</sup> Isaa oia lo atoa ita aaiesoaa ita kupikupi sso tale ia o niainoana atea, nongina God ghe uela va,

“Liuna avalua o me tale sessaiaaghi aghe aulia ngaotula tale inangari nialokoi va karika poi aue la kupi sso tale uneghi niainoana,”

arongo ta uunguaane ghe ruula nau ghe gheleila kosa ateva. <sup>4</sup> Elome tale Uru ngai Manga ateva ghe auliaala nau ghaituna ateva, tale inangari isaa avalua toko va, “Tale nau ghaituna ateva God ghe ainoanala tale uunguaane akapa.” <sup>5</sup> Me nongina ghe aulia ngakasinala mua va,

---

**4:3:** Sams 95:11; Hib 3:11.    **4:4:** Aitiutiu 2:2.    **4:5:** Sams 95:11.

“Karika poi aue la kupi sso tale uneghi niainoana.”

<sup>6</sup> Liuna avalua o me ekookoronna va katoa aue la kupi sso tale ia o niainoana atea, me ta lo atoa laghe aulia ngakasinala masi kiukiu etaira, karika laghe kupi ssola poli laghe tam nongonongo usilaa. <sup>7</sup> Liuna avalua o me God ghe mene suimatoongaala kateva nau, “ghaine,” nau ghe aulieiniela ta Deivit tale oroieili ninamanama atoa ngila ghe lao sio, nongina ghe auliaala emua arau va,

“Ghaine, arova am nongonongo lingi ngalona ateva,  
am rou mene akorokorongana urunguitanimim.”

<sup>8</sup> Poli arova Josua ghe tau lao sio niainoana etaira, God karika aue ghe auliaa mene kateva nau. <sup>9</sup> Liuna avalua o me niainoana nongina nau manga ateva etoitoi kapuna taumattu ngatoa God.

<sup>10</sup> Poli arova lo ateva ekupi sso tale niainoana kanno God, eaainoana tee tale uunguaane nongina God ghe ainoanala tale uunguaane. <sup>11</sup> Liuna avalua o me ita ghelei isaa akapa ase salana tani kupi sso tale ia o niainoana atea, me karika teva aue eaimuli tee ia o ase nitam nongo usila ngateva.

<sup>12</sup> Poli inangarina ateva God maulue ia, sarasarakana uunguaane me maamatarokeane elaulau baenata ateva matarroke pai ekapa aluevilau. Erooro tani uvi liuna tani sso nongina nannaa me voto nongina nialousiusero lalo aaitiuaa, me aighoughou me llo etokatoka

**4:7:** Sams 95:7-8.    **4:8:** Diut 31:7; Jos 22:4.    **4:10:** Hib 4:4.

**4:12:** Ips 6:17; Aotu 1:16; 19:13-15.

elome tale riu. Egheelei niaisakei tale ninannaa me gheeleiaa urunguitaniita ateva. <sup>13</sup> Karika teva llo God ghe gheleila erooro tani aisulia ta matane. Isaa akapaaili voto karika aakou runga, ta matane etaatara akapa me ekilakila voto akapaaili, me ta ngetana aue ita tani auliaa sa ateva ita ghe gheleieia.

*Iesu namuu ia ta pristi ekapa atoa*

<sup>14</sup> Liuna avalua o me poli pristi eteva namuu ia, elaulau pristi ekapa atoa, ghe saela epona liu tani aimatoongainita, Iesu etana, Natuna ia God, ita poso parasi tale kaluita niaikaaiia ita aulia ngaotu. <sup>15</sup> Poli karika va kapuita pristi eteva namuu ia etam rooro tani alousiusi tee kaluita saghuighuina, ta ia ghe ghaala nitootoonga tale isaa akapa salana nongina ita, me karika righi kannna ssavoto. <sup>16</sup> Isaa avalua o me ita rou mene matautu tani lao nongina God etokatoka, ia eaapasunga maamasinaane ta kapuna taumattu ngatoa, me aue ealousiusi teeita, me ita ghaa maamasinaane tani sausita tale nau ita aaloanna niaisausi.

## 5

<sup>1</sup> Poli ila akapa namuu ta pristi etoa, nau God ange anna tani ghaa kateva elome ta taumattu ngatoa, esuisuitoongainia tani aimatoonga taumattu ngatoa tale niuungu kannna God, tani taula voto ta God me tani ghelei aiaavusuvusuea tani ghaa velu ssavoto. <sup>2</sup> Ia karika aue essai parasia tee lo atoa karika la kilakila amasina kasina tani voto me la tiutiu ppae, poli ie tee

nim taumattu ia me saghuighuina ia. <sup>3</sup> Poli ie tee saghuighuina ia, liuna avalua o me etani ghelei sae aiaavusuvusuena tale kanna tani ssavoto me kaluira ssavoto tee taumattu ngatoa. <sup>4</sup> Karika teva erooroo tani nim ghaa nioneoneaa tale nim aaloannaane. God etani koloa nongina ghe kolola Eron.

<sup>5</sup> Karisto tee karika va nim ia ghe asaesaela ararina ateae va namuu ia ta pristi etoa, ta God ghe uela etana va,

“Io natughu io,  
ghaine nge tamam ieghila.”

<sup>6</sup> Me ghe auliaala tale mene kasina inangari nipitipiti manga va,

“Io pristi io nau ekapa atoa  
nongina Melkisedek.”

<sup>7</sup> Tale nauna Iesu me maamauluaane tale kosa ateva oia, ghe gheleila nilooloo sae me nikkolomi sae tale nisausi tale ningala anamuu tee rarum mata ta lo ateva ghe roola tani asaangia tale nimate, me God ghe nongoala poli unna nioneoneaa ta lo ateva namuu ia etana. <sup>8</sup> Arongona ta Iesu natuna ia God, ghe ghaaghaa alomasaanga tale uunguaa ninongo usilaa, tale nimmarikana ghe ghaala. <sup>9</sup> Me nau God ghe ghelei emasina akapaailiela, ghe liue salanala tale niasaangi eteae tokatoka liu ia ta lo akapa atoa la non-gonongo usilainia. <sup>10</sup> Me God ghe suitoongainiela va enamuu ta pristi etoa, nongina Melkisedek.

---

**5:3:** Lev 9:7; 16:6.    **5:4:** Eks 28:1.    **5:5:** Sams 2:7.    **5:6:** Sams 110:4; Hib 6:20; 7:1.    **5:7:** Mat 26:36-46; Plp 2:6-8.

*Niauliaa kieita tale uunguaa nioghi vulu masi salana*

<sup>11</sup> Oroieili voto ami anna tani auliaa tale isaa oia voto, me aanasa tani aulia ngamasalika poli karika ailuiluina am tani ghaa alomasaanga.

<sup>12</sup> Ang ghe alusela nau ngam ghe tau ngaiesoala, me isaa oia nau am ghele tau ngai aapasunga, me karika, ta etani maamasina va teva emene apasunga tau aatu voto eaitiutiu tale uunguaa koronna tale inangarina ateva God tani mene laa tiuaa. Karika am ghe roo tani nama inana korokorongana, ta am nongina aliki etoa la sussu.

<sup>13</sup> Lo ateva esussu aliki ia, karika ekilakila llo masina me llo sesa. <sup>14</sup> Me inana korokorongana aneira matuenna atoa taumattu, ngila ghe tukatukaala tani ghelei masi voto. La rooro tani tara kila llo masina me llo sesa.

## 6

<sup>1</sup> Liuna avalua o me ita kasu vuli llo voto ngita ghe kila akasinala ta Karisto, me ita toka tau sae tale voto aue egheleita ita matuenna, me karika ita mene atingina ghaluene suena tale uunguaa ninna ngaioghioghiaa tale voto ekaakat-ulainita lao tale nimate, me tale niaikaaiaa ta God, <sup>2</sup> niloeloe tale niaasuu, me tani saooa nima, me nitotu tale nimate, me niaisakei eteae tokatoka liu ia. <sup>3</sup> Me aue ita ghelei isaa o voto, marova aloaloannaane God.

<sup>4</sup> Lo atoa ngila ghe kilala aloannaane God, ngila ghe tootoongaala masi voto epona liu, me ila tee laghe aitauaala Spirit Manga ateva, <sup>5</sup> me laghe namunamuaala masi inangarina ateva God

me sarasarakaniaane tale nau too emaemae, <sup>6</sup> marova la katuu vulu, karika mene tikirighi salana tani mene oghi mae tale uunguaa ninna oghioghiaa. Tale isaa o llo la gheelei, la mene aavukala sae Natuna ateva God tale aikotoo, tani mene apalataia ghaluene tale tummatavanga. <sup>7</sup> Poli llo kosa vaoo ateva ekaakatuu etana oroi nau, eaapinosa amasina inana umana lo ateva ghe pasala. Ia o ase kosa ateva eghaaghaa niarangise ta God. <sup>8</sup> Me llo kosa eapinosa uasa karasa me llo uasa rorroana aue epeisaane, karika masau me aue eghaa nikasikiena, me aue airuuruu ia o ase kosa ateva aue eataia.

<sup>9</sup> Masi kapuimami etoa, arongona ta ami aaip-pooa ngavalua o, ami arikaaiangaili va masi voto aue elutu etaimim, voto elaolao aitauaa tee nisaanga. <sup>10</sup> God karika va sesa taumattu ia, karika erooroo tani kkaluaa uunguaaimim me aailousiaaimim am ghe apasungaala etana, nau am ghe sausila kapuna taumattu ngatoa tale nau too me isaa tee oia. <sup>11</sup> Ami aaloanna va kateva kateva etaimim eapasunga ia o ase niuungu eteva, me karika am mene mangoovulua lomosi ta airuuruu, me saa voto am toitoi tani ghaa, aue am vira mene ghaa. <sup>12</sup> Karika ami anna va am mangoona ta am ghelei nongina lo atoa uneira niaikaaiiaa karika ekaakatuu tani toitoi, tani ghaa voto aue ekalaira God ghe auliaala tale inangari nialokoi.

### *Kinatama inangari nialokoi kannu God*

---

**6:6:** Mat 10:22; Hib 10:26-27; 1 Jon 5:16. **6:8:** Aitiutiu 3:17-18; Mat 13:7, 22. **6:10:** Hib 10:32-34.

13 Nau God ghe gheleila kanna inangari nialokoi ta Abraham, ta poli karika teva mene namuu ia etana tani auliaa inangari koronna, eghe nim auliaala tale ararina atea. 14 Ghe uela va, “Aghaaulia ngakoronna va aue agharangiseio me atau aatu oroieili tuvum atoa.” 15 Me nau eteva Abraham ghe tam mangoola tani toitoi, Abraham ghe ghaala voto God ghe auliaala ta ngetana tale inangari nialokoi.

16 Taumattu ngatoa la ghaauliaa inangari niaulia ngakoronna sae\* ta lo ateva taumattu ararina atea namuu ia etaira, me isaa o inangari niaulia ngakoronna sae eghelei ekoronna sa ateva la ghaaulieinia, me eruuruu ekapa niaissakeana. 17 God ghe gheleila inangari nialokoi ta Abraham, me ghe aaloanna va lo atoa aue la ghaa isaa o voto la kila amasina va karika aue eaikolikoliaa nannaane, liuna avalua o me ghe auliaala inangari niaulia ngakoronna sae. 18 God ghe gheleila ilalua o voto alua, inangari nialokoi me inangari niaulia ngakoronna sae ta God, me ilalua o voto alua karika lalu aaikolikoliaa, me God karika erooroo tani kamekame. Ita lo atoa ita ghe iloula tani laa poso tale nitaatara lao emua, aue ita ghaa namuu niaisausi. 19 Nitaatara lao emua isaa etaita nongina angga ngateva tale maamaulu-aaita, korokorongana ia me karika aue eaisiisia. Ghe kupi ssola elome tale rum mangaaili etiulu, emuli tale kalio atiulu. 20 Tale ia o voto ateva Iesu ghe muemueinitala tani sso etana, ghe kupi ssola

---

**6:13:** Aitiutiu 22:16-17. \* **6:16:** auliaa inangari niaulia ngakoronna sae Taumattu ngatoa la ghaulia ngakoronna sae tale ararina atea God. **6:18:** Nam 23:19. **6:19:** Lev 16:2-3.

mausiita. Ia kapuita pristi ia namuu ia tokatoka liu ia, nongina Melkisedek.

## 7

### *Melkisedek pristi ia*

<sup>1</sup> Ia oia Melkisedek, kingi ia eSalem me pristi ia ta God iaaili epona, ghe soula Abraham nau ghe kiriaala tale niaiuvii eteae nau ghe apalala kingi etoa, me Melkisedek ghe arangiseiela. <sup>2</sup> Me Abraham ghe tau lao sio ta Melkisedek aiaasokolo tale isaa akapa voto. Aitiutiu, ararina atea, malloeana va “kingi ia tale nighulughuluena”, me tee, “kingi ia eSalem,” malloeana va “kingi ia tale luei.” <sup>3</sup> Karika righi kiukiuna va ia see ia, karika teva tamane me karika teva kinna, me karika toa tuvuna, me karika righi aitiutiu tale nauna, o airuuruu tale maamauluaane, nongina Natuna ateva God, ia pristi laalaa liu ia.

<sup>4</sup> Am nim nnaa va ararina atea namuu ia, poli Abraham, tuvuiria ia aJiu etoa, ghe taula aiaasokolo tale voto ghe sarila ta tau ngai ssateena atoa. <sup>5</sup> Tale inangari nipaopao, kateva inangari niaulia ngakororongana eue va mangalina atoa Livae ila pristi ila la ghaa aiaasokolo ta kapuira atoa aIsraeli ila, arongona ta ila tee kapuira me mangalina ila Abraham. <sup>6</sup> Me ia oia taumattu ngateva, arongona ta karika mangalina ta Livae, me ghe nim ghaala aiaasokolo ta Abraham, me ghe arangisela lo ateva ghe ghaala inangari nialokoi. <sup>7</sup> Me karika teva erooro tani ue va kamaena va, lo ateva taumattu ararina atea epona,



eaarangise lo ateva taumattu ararina atea eue. <sup>8</sup> Ila akapa pristi etoa laghe ghaala aiaasokolo, angila ghe matela, me Melkisedek, ghe ghaala aiaasokolo ta Abraham, Uru ngai Manga ateva karika eue va ghe matela. <sup>9</sup> Kateva aue eroo tani ue va Livae, ghe ghaaghaa aiaasokolo, ghe taula aiaasokolo nau Abraham ghe tau lao sio ta Melkisedek, <sup>10</sup> poli nau Melkisedek ghe soula Abraham, Livae elome ta vilikina Abraham, poli tuvuna ia.

### *Iesu nongina Melkisedek*

<sup>11</sup> Arongona ta inangari nipaopao kanna Moses eue va pristi etoa la tani mae tale ararimangalina ateva Livae, uunguaaira pristi etoa karika erooro tani ghelei eghulughuluena teva. Liuna avalua o me mene kateva pristi etani mae nongina Melkisedek, me karika va nongina Eron. <sup>12</sup> Poli arova righi niaikolikoliaa ta pristi etoa me uunguaaira, inangari nipaopao tee aue etani aikolikoliaa. <sup>13</sup> Ia oia lo ateva eaaulieinia ararimangalina ppae ateva, me karika teva tale ia oia ararimangali eteva ghe uungu tale liu nighelei aiaavususuvuena. <sup>14</sup> Poli masalikeaili va Vauita ateva ghe lutula tale ararimangali eteva ta Jiuda, me tale ia o ararimangali eteva Moses karika ghe auliaala righi voto va pristi ila. <sup>15</sup> Me sa ateva ami ghe aulieiniela masalikeaili ia va arova mene kateva pristi nongina Melkisedek ekauerekati, <sup>16</sup> ia lo ateva ghe pristila karika esuisui kkai tale inangari nipaopao nongina tuvuna atoa. Ta

---

**7:14:** Ais 11:1; Mat 2:6; Aotu 5:5.

esuisui kkai tale sarasarakaniaa lo ateva mauhue karika aue ekapa. <sup>17</sup> Poli laghe aulia ngaotula va, “Io pristi io nau ekapa atoa nongina Melkisedek.”

<sup>18</sup> Llo voto tani aimuli tee emua arau ang ghe vullala poli maomaona me sesa <sup>19</sup> (poli inangari nipaopao karika eroroo tani ghelei eghulughuluena teva voto), me masi voto ghe kauerekatila, ita taatara lao emua etana, eaulia ngaotu isaa o voto egheeleita va ita rooroo tani lao akalakalaa ta God.

<sup>20</sup> Me karika va karika righi inangari niaulia ngakoronna sae ta God. Katoa laghe pristila me karika righi inangari niaulia ngakoronna sae laghe gheleila, <sup>21</sup> me ia ghe pristila tee inangari niaulia ngakoronna sae nau eteva God ghe uela etana va,

“Vau ngepona ang ghe aulia ngakoronnala me karika aue eaikolikoliaa nannaane: ‘Io pristi io nau ekapa atoa.’ ”

<sup>22</sup> Mausi ia o inangari niaulia ngakoronna sae ta God, me Iesu ghe tau mae sio masina ateva inangari niaipooa ngaitauaa.

<sup>23</sup> Ghe ooroieili pristi etoa, poli karika laghe rooroo tani ghelei uunguaaira pristi etoa nau ekapa atoa poli uunguaa nimate ateva. <sup>24</sup> Me poli Iesu etokatoka nau ekapa atoa, ia lo ateva pristi karika aue eruu. <sup>25</sup> Liuna avalua o me nau ekapa atoa ia eroroo tani asaangi lo atoa la mae ta God tale ararina atea, poli ia etokatoka nau ekapa atoa tani kolomi niaisausi ta God mausiira.

---

**7:17:** Hib 5:6.      **7:19:** Hib 10:22; Jms 4:8.      **7:21:** Hib 5:6.

**7:22:** Hib 8:6; 12:24.      **7:25:** Rom 8:34.

<sup>26</sup> Poli emaamasina va aue ita ghaa ia oia ase namu ngateva tani pristi, ta ia etautau rooroa aloaloannaaita. Ia manga ia, karika la ghaaliu teeia tale righi voto sesa, raarangisana ia, karika etokatoka aitaaua tee ssavoto, me God ghe atokaie saela eponaaili. <sup>27</sup> Karika nongina mene katoa namuu ta pristi etoa, karika erooro va ghe toka ghelei aiaavusuvusuena nau ekapa atoa, etiuaa mua tale kanna ssavoto, vara me tale kaluira ssavoto taumattu ngatoa. Me ia, ghe gheleila aiaavusuvusuena tale kaluira ssavoto taumattu ngatoa katengaata nonga, nau ghe taue lao sio arova voto la ghelei sae aiaavusuvusuena etana. <sup>28</sup> Poli inangari nipaopao esuisuitoongaa namu ngatoa ta pristi etoa nim taumattu ıla, arongona ta maomaona ıla, me inangari niaulia ngakoronna sae ta God, ghe mae sio emuli tale inangari nipaopao, ghe suitoongaala Natuna ateva, God ghe ghelei eghulughuluena laalaa liuela.

## 8

*Namu ngateva pristi tale ouna inangari niaip-pooa ngaitauaa*

<sup>1</sup> Liuena voto ami aauliaa isaa avalua toko, va ia o pristi eteva namuu ia etokatoka, me ghe toka siola tale pai muenna ativilau ta God epona liu.

<sup>2</sup> Me euungu tale voto ateva manga ia, lo ateva ale kandisi manga ia koronna ia Vau ngepona ghe atinginaie saela, karika va taumattu.

<sup>3</sup> Ila akapa namuu tale pristi etoa la suisuit-oongainila tani taula voto ta God me tani ghelei

aiaavusuvusuena. Liuna avalua o me ghe masinala va lo ateva tee oia ie tee ghe tau sae teva voto tani tau lao ta God. <sup>4</sup> Arova ia tale kosa ateva oia, karika aue ghe pristi, poli taumattu ang ghe tokala laghe tautau sae voto ta God, nongina inangari nipaopao ghe auliaala. <sup>5</sup> Laghe uungu tale voto ateva manga ia taataraane me tootoona llo voto epona liu. Liuna avalua o me God ghe auliaala kiena Moses nau ang ghe anna tani ghelei ale manga ateva kandisi ia, ghe uela etana va, “Utani tara amasina va ughelei isaa akapa voto nongina taataraa lo ateva ughe taraiela tale motouru.” <sup>6</sup> Ta poli niuungu Iesu ghe ghaala elaulau uneira pristi etoa, me inangari niaippooa ngaitaua ngateva Iesu ghe gheleiela elaulau pokane ateva, poli etokatoka tale masi inangari nialokoi.

<sup>7</sup> Poli arova karika righi sesa tale aitiutiu eteva inangari niaippooa ngaitauaa, karika righi uunguaane aiaaghaluene ateva tani koliaa aitiutiu eteva. <sup>8</sup> Poli God ghe tarala kaluira sesa voto taumattu ngatoa me ghe uela va,

“Vau ngepona ghe auliaala va: Nau too emaemae aue aghelei ouna ateva inangari niaippooa ngaitauaa tee taumattu nge Israeli etoa me ajiuda ngatoa.

<sup>9</sup> Karika aue enongina lo ateva inangari niaippooa ngaitauaa aghe gheleiela ta tuvaira atoa nau aghe kunela nimaira

---

**8:5:** Kol 2:17; Hib 9:23; Eks 25:40.  
31:31-34.

**8:6:** Hib 7:22.

**8:8:** Jer

me aghe katulaa vellala tani kasu vuli eIjip,  
 poli karika laghe aaimuli emasina tee kalughu  
 inangari niaippooa ngaitauaa,  
 aghe liula vilighi etaira,

Vau ngepona ghe aulia ngaotula.

10 Vau ngepona ghe mene aulia ngaotula va,  
 vara isaa o nau elange, inangari niaippooa  
 ngaitaua ngateva aue agheleia ta taumattu  
 nge Israeli etoa,

ia avalua toko va:

Aue aghatoka kalughu inangari nipaopao tale  
 nannaaira

me aue apitia tale urunguitaniira

me aghi aue kapuira Goto ieghi,

me ila aue la kapughu taumattu.

11 Karika teva taumattu aue emene apasunga ta  
 lo ateva etokatoka akalakalangina teeia  
 o ta teva tuena o nengane tani ue va, ‘Ukila  
 Vau ngepona ateva.’

Poli ila akapa aue la kilaieghi,

lo atoa matuutulienna ila me lo atoa karika  
 matuutulienna ila.

12 Ta aue akkaluaa sesa gheeleiaaira,  
 me karika aue atoka nanna kaluira  
 ssavoto.”

13 Nau ghe aauliaa ia oia inangari niaippooa  
 ngaitaua ngateva va ouna ia, ghe gheleila aitiutiu  
 eteva ghe vullaiela poli ang ghe pokala me aue  
 ekapa.

## 9

### *Nikkauaa tale ale kandisi eteva*

<sup>1</sup> Tale aitiutiu eteva inangari niaippooa

ngaitauaa, God ghe alokoila kasina salana tani usilaa tale uunguaa nikkauaa, me tee ale nikkaua ngateva ghe tokatoka tale kosa ateva oia. <sup>2</sup> Ale kandisi eteva oia laghe gheleuela, ghaluulu rum elome ta ngetana. Tale aitiutiu etiulu rum, aitiitinginane ateva lam atea tee me tevoo ateva aiatoka verete laghe amangala, ia o rum atiulu, la kolokoloa va rum atiulu manga ia. <sup>3</sup> Emuli tale aiaaghalua atiulu kalio, rum atiulu laghe aseasea va rum atiulu mangaaili ia. <sup>4</sup> Elome ta ngetana olta ngateva gheleui ia tale gol, me vokisi eteva eaaimatoonga inangari niaippooa ngaitauaa gheleui ia tee tale gol. Elome ta ngetana aikaai mena ngateva gheleui ia tale gol, me aikkatuluna atiulu Eron ghe kuneaala pusi ngai, me tee inangari nipaopao laghe pitila tale atu elua. <sup>5</sup> Epona tale vokisi eteva keruvim alua, lalu aaimatoonga va God etokatoka tale ia o voto ateva, kaekaeirarua ghe aakou aikou vokisi eteva, voto ateva God ekakkaluaa ssavoto etana. Me ghaine karika righi nau tani aulia ngamasina akapa isaa oia voto.

<sup>6</sup> Nau isaa akapaaili voto laghe atoka avaluella o, nau ekapa atoa pristi etoa laghe sosso tale aitiutiu etiulu rum tani gheleui uunguaaira. <sup>7</sup> Me namu ngateva ta pristi etoa ia nonga ghe sosso tale aiaaghaluene atiulu rum, katengaata nonga tale kateae ninamanama, me karika va nim ia, ta ghe sossoa tee rae, tani gheleui aiaavususuvusuaena ta ngetana me tee tale ssavoto kaluira taumattu

---

**9:3:** Eks 26:31-33.    **9:4:** Eks 16:33; 25:10-16; 30:1-6; Nam 17:8-11; Diut 10:3-5.    **9:5:** Eks 25:18-22.    **9:6:** Nam 18:2-6.    **9:7:** Lev 16:2-34.

ngatoa laghe gheeleei me karika laghe kilakila va sesa. <sup>8</sup> Tale isaa oia voto, Spirit Manga ateva eapasunga va ia o salana atikirighi tani sso tale rum atiulu mangaaili ia, karika ghe otia va taumattu ekupi sso poli aitiutiu etiulu rum, ia etokatoka. <sup>9</sup> Isaa akapaaili o voto eaaimatoonga ia oia nau etiulu, me eaaimatoonga va voto ita tautau lao me aiaavusuvusuea ita gheeleei sae, karika eroroo tani gheleei emasalika nannaaira tau ngai kkaua ngatoa la tautau lao isaa o voto. <sup>10</sup> Isaa oia voto la nim gheeleei tale inana me manu, me asease niuungu tani pora sesa gheeleeiaaira taumattu ngatoa. Isaa oia voto nim salana ila tani gheleei eleka tale vilikiira, aue la toka lomosina ta nau ateva God aue eatoka ouna voto tani usilaa.

### *Raena ateva Karisto*

<sup>11</sup> Nau Karisto ghe mae sio nongina teva namuu ta pristi etoa, tale masi voto ang ghe atoka akasinala oia\* tale ouna ateva inangari niaip-pooa ngaitauaa, eghe lao sio tale masinaaili me koronna ateva ale kandisi, karika va taumattu ngatoa laghe gheleeiela, me ita roo tani ue va, karika va laghe gheleeiela tale kosa ateva. <sup>12</sup> Karika ghe kupi ssola tale mangaaili etiulu rum tee rae meemee me natu vulumakao, ta ghe kupi ssola katengaata mausiita akapaaili tale raena ateva, tani ghaa niasaangi eteva tokatoka liu ia. <sup>13</sup> Inangari nipaopao ghe uela va la kaokao sae rae meemee me vulumakao me aunna

---

**9:9:** Hib 10:1-2. \* **9:11:** masi voto ang ghe atoka akasinala oia Kasina uru ngai laghe pitila, laghe uela va, masi voto aue emae.

**9:13:** Lev 16:15-16; Hib 10:4; Nam 19:9, 17-19.

aliki vause ateva vulumakao laghe tungitungia ta lo atoa karika raarangisana ila tani ghelei eraarangisanaila me tani amangaila, arongona ta laghe ghelei eraarangisana nonga vilikiira. <sup>14</sup> Arova ia avalua o, raena ateva Karisto kororonganaaili ia tani ghelei eraarangisanaita. Tale sarasarakaniaane Spiriti eteva tokatoka liu ia, Karisto ghe taue mae sio nongina lo ateva aiaavusuvusuenta sae ta God karika righi voto sesa etana. Ghe ghelei eraarangisanala nannaaita tale ase niuungu elaolaoainita tale nimate, me tani uungu ta God ateva tokatoka liu ia.

<sup>15</sup> Liuna avalua o me Karisto ghe alokoila lo ateva o ouna inangari niaippooa ngaitauaa. Ghe ghelei evaluela o poli ghe aaloanna va lo atoa ghe suitoongainilala la rooro tani ghaa masi voto ghe aulia ngalokoila tale inangari nialokoi eteva tokatoka liu ia — ia ghe matela tani poli aoghi me tani gheleila me la saanga tale ssavoto laghe gheleila tale pokane ateva inangari niaippooa ngaitauaa. <sup>16</sup> Nim nongina tale inangari niaippooa ngaitaua ngateva, kateva etani mate. <sup>17</sup> Poli ia o inangari niaippooa ngaitaua ngateva esarasarakana nau lo ateva ghe aulia ngalokoila ange matela. Karika righi sarasarakaniaane inangarina nau taumattu ngateva maulue ia. <sup>18</sup> Liuna avalua o me aitiutiu eteva inangari niaippooa ngaitauaa laghe ghelele tee rae. <sup>19</sup> Nau Moses ghe aulia ngaotula isaa akapaaili inangari nipaopao ta ila akapa taumattu ngatoa, ghe ghaala raeira natu vulumakao atoa me meeme



atoa, me tee manu, me uu sipsipi raeraeanaaili me laangi isopi me ghe aakaokao sae tale vuku eteva me ila akapa taumattu ngatoa, <sup>20</sup> me ghe ue va, “Ia oia raena ateva inangari niaippooa ngaitaua ngateva, ia God ghe tani aulieiniela va am aitarainia.” <sup>21</sup> Tale ia nonga o salana atikirighi ghe aakaokao sae rae tale ale kandisi eteva me tale isaa akapaaili voto laghe uunguaa tale asease uunguaa nikkaua. <sup>22</sup> Koronnaaili, tale inangari nipaopao gharighi tau isaa akapaaili voto laghe ue va la ghelei eraarangisana tale rae ateva, me marova karika rae ghe akaakala, karika righi nikkaluaa.

<sup>23</sup> Isaa oia voto nim tootoo tale voto koronna epona liu, emaamasina va isaa akapaaili o voto tale kosa ateva la tani ghelei eraarangisana tale aiaavusuvusuena, me voto ngepona liu, ghe ghelei eraarangisanala tale masi aiaavusuvusuena elaulau voto tale kosa ateva. <sup>24</sup> Poli Karisto karika ghe kupi ssola tale lo ateva o ale nikkaua taumattu ngatoa laghe gheleiela, nim tootoona ia lo ateva koronna ia; eghe kupi ssola epona liu, tani tingina emua ta matane God mausiita. <sup>25</sup> Karika ghe kupi ssola epona liu tani mene taue mae ta ngetaita oroiaata, nongina salana atikirighi namuu ta pristi etoa ghe kupikupi sso tale rum atiulu mangaaili ia tale isaa akapaaili ninamanama tee rae, karika va raena. <sup>26</sup> Arova isaa avalua o, ghe tiuaala tale aitiutiu tale kosa ateva, aue oroiaata Karisto aue ghele nim toka matemate. Me isaa oia ghe mae

---

**9:21:** Lev 8:15, 19.    **9:22:** Lev 17:11.    **9:23:** Hib 8:5; 10:1.  
**9:26:** Hib 10:10.

sio katengaata nonga mausiita tale airuuruu tale nau, tani ghaa velu ssavoto nau ia ghe gheleila niaiaavusuvusuena tale vilikina. <sup>27</sup> Nim nongina taumattu ngatoa aue la mate katengaata, me emulina aue la tingina tale niaisakei, <sup>28</sup> Karisto ghe gheleila aiaavusuvusuena ta ngetaita katengaata, tani ghaa velu kaluita ssavoto; me ia aue emae aghaluene, karika va tani mene ghaa velu kaluita ssavoto, ta emae tani tau mae niasaanga ta lo atoa la toitoia.

## 10

*Karisto ghe aiaavusuvusunala katengaata ta ngetaita akapa*

<sup>1</sup> Inangari nipaopao nim tootoo tale voto masina aue emae, karika va tani koronna isaa o voto. Liuna avalua o, me aiaavusuvusuena la nim toka ghelei tale ninamanama atoa, karika erooroo tani ghelei eghulughuluena lo atoa la laolao akalakalaa tani kkauaa. <sup>2</sup> Aiaavusuvusuena karika erooroo tani ghelei eraarangisanaila, liuna avalua o me karika laghe ruuruu tani toka ghelei sae aiaavusuvusuena. Arova tau ngai kkaua ngatoa laghe raarangisanala, karika aue la ghe ateatea maamatana tale kaluira ssavoto. <sup>3</sup> Me isaa o aiaavusuvusuena la ghelei katengaata tale kateae ninamanama emene gheleita ita mene nannaa kaluita ssavoto. <sup>4</sup> Poli raeira vulumakao atoa me meeme atoa karika erooroo tani ghaa velu ssavoto.

<sup>5</sup> Liuna avalua o me nau Karisto ghe sio mae tale kosa ateva, ghe uela va,

“Aiaavusuvusuena me opring karika ughe aanna, ta viliki eteva ughe aimonomosieiniela etaghi.

<sup>6</sup> Tee, aiaavusuvusuena eataata akapa me aiaavusuvusuena tale ssavoto karika ughe masimasiaala.

<sup>7</sup> Vara me aghe uela va, ‘Aghi toko — laghe pitila me laghe aulieinaghila tale Uru ngai Manga ateva — aghe sio mae tani ghelei aloaloannaam, God.’”

<sup>8</sup> Aitiutiu ghe uela va, “Aiaavusuvusuena me opring, me aiaavusuvusuena eataata akapa me aiaavusuvusuena tale ssavoto, karika ughe aloan-nala, me karika ughe masimasiaala” (arongona ta inangari nipaopao eue va la ghelei). <sup>9</sup> Vara me ghe uela va, “Aghi toko, aghe sio mae tani ghelei aloaloannaam.” Ghe ghaa vella aitiutiu eteva tani atoka aiaaghaluene ateva. <sup>10</sup> Me tale ia o aloaloannaane ateva, ang ghe ghelei emangaitala tale aiaavusuvusuena tale vilikina Iesu Karisto katengaata ta ngetaita akapa.

<sup>11</sup> Nau ekapa atoa pristi etoa la tiitingina tani ghelei uunguaaira tale ale nikkaua ngateva; nim isaa aitaaua nonga aiaavusuvusuena atoa la nim toka gheeleia, karika erooroo tani ghaa velu ssavoto. <sup>12</sup> Me nau eteva Karisto ghe gheleila ia o aiaavusuvusuena ateva mausi ssavoto ateva, katengaata nonga, ghe toka siola tale pai muenna ativilau ta God. <sup>13</sup> Tale isaa o nau etoitoi tau ngai ssateena atoa va God eatokaila sio euu me eatingina sae kkena etaira. <sup>14</sup> Poli tale kateva

nonga aiaavusuvusuena me Karisto ghe ghelei eghulughuluena lo atoa God eaamangaila.

<sup>15</sup> Spirit Manga ateva tee ghe asokoila etaita isaa oia voto. Aitiutiu ghe uela va,

<sup>16</sup> “Inangari niaippooa ngaitaua ngateva aue agheleia ta ngetaira, va vara isaa o nau elange,

Vau ngepona ghe aulia ngaotula va aue ia avalua toko.

Aue aghatoka kalughu inangarighi nipaopao tale urunguitaniira, me aue apitia tale nannaaira.”

<sup>17</sup> Vara me ghe mene uela va,

“Kaluirea ssavoto me gheeleiaaira karika elaolao aitauea tee inangari nipaopao, karika poi va aue amene annaa.”

<sup>18</sup> Me nau isaa oia voto ang ghe kkaluaala, karika mene righi uunguaa nighelei sae aiaavusuvusuena.

*Nikolokolo ateaie tani tingina asarasarakana*

<sup>19</sup> Liuna avalua o, kapughu etoa, karika ita roo tani mene matautu tani kupi sso tale rum atiulu mangaaia ia mausi raena ateva Iesu. <sup>20</sup> Ghe otila ouna atikirighi salana etautau mae maulue ateva, tani kupi sso tale kalio atiulu, ia o vilikina ia. <sup>21</sup> Me poli ia kapuita pristi eteva iaaili epona tale alena ateva God, <sup>22</sup> ita lao akalakalaa ta God tee koronna urunguita pasu tale niaikaaiia. Poli tale raena ateva Iesu ghe pora araarangisanaitala tale sesa ninannaa, me ghe porala vilikiita tale

**10:16:** Jer 31:33; Hib 8:10.  
4:16. **10:20:** Mat 27:51.  
5:26.

**10:17:** Jer 31:34.

**10:19:** Hib

**10:22:** Lev 8:30; Esik 36:25; Ips

manu raarangisanaaili. <sup>23</sup> Ita poso parasi tale nitaatara lao emua ita ghe aulia ngaotula me ita rau mene amaramara, ta lo ateva ghe auliaala isaa o voto, aue eghelei eroorooaa. <sup>24</sup> Me ita tee, ita mene annaa righi ase salana vaalua tani aisausiaa mene katoa tale niaielousi me tale masi niuungu. <sup>25</sup> Karika ita mene mangoo tani mae kkaua ngaitauaa, nongina katoa la gheelei. Me nau ekapa atoa am asarasarakana mene kateva kateva, poli am taatara va nauna ateva Karisto tani sio ange aakalakalaa.

<sup>26</sup> Marova ita nim toka gheelei ssavoto, me arongona ta ngita ghe ghaala alomasaanga tale voto koronna, karika mene teva aiaavusu-vusuena tani mene kkaluaa kaluita ssavoto. <sup>27</sup> Me karika, aue ita matautu nau ita toitoi nau ni-aisakei kanna God, me kura atea atataaaili ia aue emae tani ata tau ngai ssateena atoa God. <sup>28</sup> See ghe ratila inangari nipaopao kanna Moses, me marova ghalua o kotolu taumattu laghe aasokoi voto sesa ghe gheelei, karika righi nialousiusi etana, laghe tani uviuvi ematea. <sup>29</sup> Me vaalua ta lo ateva taumattu easaasa tau sio Natuna ateva God? Eghelei raena ateva Natuna ateva God ghe amangaiela va karika manga ia, me tee eaauliaa saasakiaa ta Spirit eteva eaapa-sunga maamasinaane God. <sup>30</sup> Poli ita kilakila lo ateva ghe uela va, “Aghi aue aliu me aghelei saasakieinila.” Me ghe uela tee va, “Vau ngepona ateva aue eghelei niaisakei tale kapuna taumattu

---

**10:25:** Hib 3:13.    **10:26:** Hib 6:4-8.    **10:27:** Ais 26:11.

**10:28:** Diut 17:6; 19:15.    **10:29:** Eks 24:8; 1 Ko 11:27-29; Mat 12:30-32.    **10:30:** Diut 32:35-36; Sams 135:14.

ngatoa.” <sup>31</sup> Matautunaaili tani lau tale nimana God ateva tokatoka liu ia.

<sup>32</sup> Am nnaa isaa too nau ang ghe lao sio, nau eteva am ghe ghaala mallanga ateva, am ghe ghaala oroieili voto sesa, me isaa o voto karika ghe gheleiemla va am ghe katuula. <sup>33</sup> Kasina nau laghe auliaa saasakiaa teiem me laghe ghelei voto etaimim karika poi masina ta mata ngoroi etoa, me kasina nau am ghe aaimonomosiaa tani lao aitauea tee tau ngaiesoa ngatoa laghe ghelei saasakieinila. <sup>34</sup> Am ghe aalousiusi tee tau karavusu etoa me am ghe saausila, me nau peimim laghe sarasarakana tani nim ghaa tale aloannaaira, karika am ghe aalousiusi tee peimim, ta am ghe masimasi, poli am ghe kilakila va voto masinaaili etokatoka, me aue etoka nau etoa, isaa epona liu. <sup>35</sup> Liuna avalua o me am rou mene velu kaluimim nimatuutuliena ta God, poli aue am ghaa aipolipoli eteva namungaili ia.

<sup>36</sup> Am tani tingina akoronna tani ghelei aloaloannaane God, me aue am ghaa saa llo ghe auliaala tale inangari nialokoi. <sup>37</sup> Poli,

“Karika masauna arighi

me lo ateva taumattu ange maemae aue emae me karika aue aippetana,

<sup>38</sup> me tale niaikaaiiaa kapughu tau ghulughuluena ateva aue etoka maamaulue me arova eoghi vulu isaa o voto, karika aue amasimasieinia.”

<sup>39</sup> Poli ita karika nongina lo atoa la oghioghi me nitturuu eghaaghaaila, ta nongina lo atoa la ghaiesoaa me la saasaanga.

# 11

## *Tale niaikaaiaa*

<sup>1</sup> Niaikaaia ngateva ia avalua toko va ita aiesoaa va aue ita ghaa llo emua etaita, me eaapasunga va ita rooroo tani kila va aue ita ghaa voto ita tam taatara. <sup>2</sup> Tale isaa o ase voto, me lo atoa emua arau laghe ghaala niaruaa ta God.

<sup>3</sup> Tale niaikaaiaa ita kilakila va tale niaulia ngasarasarakana tale inangarina God, me kosa ateva ghe lutula. Liuna avalua o me voto ita taatara ghaine, karika God ghe gheleilala tale voto ita rooroo tani tara.

<sup>4</sup> Tale niaikaaiaa, Eibol ghe ghelei saela lo ateva aiaavusuvusuena masina ia ta God me ta lo ateva Kein ghe gheleiela, me tale unna niaikaaiaa, God ghe arueiniela va ghulughuluena ia nau ghe ppooaala masimasiaane tale unna aiaavusuvusuena. Arongona ta ghe matela, esamasama ta ngetaita tale unna niaikaaiaa.

<sup>5</sup> Tale niaikaaiaa me God ghe ghaa saela Inok epona liu me karika ghe ateateaala nimate. Karika laghe roola tani mene taraia, poli God ghe ghaaiela. Auena God ghe ghaaia, laghe aaulieinia va God ghe masimasiaeinia. <sup>6</sup> Me karika ita rooroo tani amasimasi God arova karika righi niaikaaiaa. Poli lo ateva elao etana etani aiesoaa va God etokatoka, me etautaula aipolipoli ta lo atoa la tani paepaea.

---

**11:1:** 2 Ko 5:7.    **11:3:** Aitiutiu 1:1; Sams 33:6; Jon 1:3.    **11:4:** Aitiutiu 4:3-10.    **11:5:** Aitiutiu 5:21-24.

<sup>7</sup> Tale unna niaikaaiaa Noa, nau God ghe auliaala kiena tale llo karika ghe tara, tale nio-neoneaa tale inangarina God ghe atulula aka ateva tani asaangi vausenna ateva me natuna atoa. Tale niaikaaiaa ghe aulia ngaotula ta taumattu ngatoa tale kosa ateva oia va sesa ila me ghe ghaala nighulughuluena tale uunguaa niaikaaiaa.

<sup>8</sup> Tale niaikaaiaa, Abraham ghe nongo usilaala nau God ghe koloala tani lao tale voto ateva auena aue ghe ghaaia va ghe kanna ia, arongona ta ghe tam kilakila va eaa ghe laolao. <sup>9</sup> Tale niaikaaiaa, ghe tanganuenala tale masaliki eteae God ghe aulia ngalokoiela, nongina ativuu eteva tale anua karika anuena. Ghe tokatoka tale ale kandisi, nongina Aisiki me Jekop ila tee elome tale ia o inangari nialokoi eteva. <sup>10</sup> Poli ghe taatara lao emua tale lo ateaie masaliki taatara tokatoka liu ia, me lo ateva ie nonga ghe nnainiela me ghe atuluela, God ta ngetana. <sup>11</sup> Tale niaikaaiaa, arongona ta Abraham ang ghe taita namuula, me Sera kina ngere ia, karika ghe roola tani alakuti aliki, me ghe tamaneuela aliki eteva ghe lutula. Poli ghe tarala va lo ateva ghe auliaala inangari nialokoi, aue eghelei llo ghe auliaala. <sup>12</sup> Liuna avalua o me ta kateva nonga ia taita, nongina va matena ia, ghe alutula kolenganina atoa, ooroiaaira nongina katto atoa elomarase me rira atoa elosamarra, karika ita rooro tani ira.

---

**11:7:** Aitiutiu 6:13–7:1.      **11:8:** Aitiutiu 12:1-5.      **11:9:**  
 Aitiutiu 35:12.      **11:11:** Aitiutiu 18:11-14; 21:2; Rom 4:19.  
**11:12:** Aitiutiu 15:5; 22:17.



<sup>13</sup> Ila akapa o taumattu ngatoa laghe toka-toka tale niaikaaiia nau laghe matela. Karika laghe ghaala voto God ghe auliaala tale inangari nialokoi. Laghe tara amasau lao sio, me laghe masimasila, me laghe aulia ngaotula va ila ativuu ila me karika tanganueira tale ia oia kosa ateva. <sup>14</sup> Lo atoa taumattu la ghaauliaa isaa o ase voto la ghaapasunga va la paepae masaliki aue tanganueira. <sup>15</sup> Arova laghe aannaa masaliki laghe kasu vulila, aue laghe nnaa righi salana tani kiriaa lao. <sup>16</sup> Me karika ta laghe nannangaili masina atea masaliki pei ngepona liu ia. Liuna avalua o me God karika epaapalata nau la kolokoloa va kapuira Goto ia, poli ia ang ghe aimonomosiaala masaliki taatara atea va masalikiira ia.

<sup>17</sup> Tale niaikaaiia Abraham, nau God ghe tootoongainiela, ghe gheleila aiaavusuvusuena ta Aisiki. Lo ateva ghe ghaala inangari nialokoi ghe ainasiaala tani ghelei aiaavusuvusuena ta kateva nonga ia natuna taita ateva, <sup>18</sup> arongona ta God ghe uela etana va, “Ta Aisiki tuvum atoa aue la lutu.” <sup>19</sup> Abraham ghe nnaala va God erooroo tani totu matena atoa, me ita rooroo tani ue va nonginaaili va ghe ghaa oghila Aisiki tale nimate.

<sup>20</sup> Tale niaikaaiia, Aisiki ghe arangisela Jekop me Iso tale auena ghe lutu tale maamaulu-aairarua.

<sup>21</sup> Tale niaikaaiia, Jekop ghe arangisela natuna alua Josep, nau ghe saoainiela epona tale unna

---

**11:13:** Aitiutiu 23:4; 1 Kro 29:15; Sams 39:12; 1 Pita 2:11.

**11:17:** Aitiutiu 21:12; 22:1-14. **11:19:** Rom 4:17. **11:20:** Aitiutiu 27:27-29, 39-40. **11:21:** Aitiutiu 47:31–48:20.

aikkatulu etiulu me ghe kakkauaa God emulina ghe matela.

<sup>22</sup> Tale niaikaaiaa Josep, nau eteva ang ghe aainasiaa tani mate, ghe auliaala nau aIsraeli etoa aue la kasu vuli eIjip, me ghe aulia nga-lokoila inangari tani usilaa va sa ateva aue la gheleia tale riuna.

<sup>23</sup> Tale niaikaaiaa tamane me kinna Moses lalu ghe aisulieiniela kotolu ulana nau eteva ghe lutula. Poli lalu ghe tarala va aliki eteva oia masinaaili taataraane, karika lalu ghe matautula tani tam nongo usilaa inangarina kingi eteva.

<sup>24</sup> Tale niaikaaiaa Moses, nau eteva ghe namuula, ghe ratila va la koloa va natuna ia natuna vause ateva Peroo. <sup>25</sup> Ghe aloannala tani ghaa nimmarikana tee kapuna taumattu ngatoa God, me ghe rau mene amasimasia tani ghelei ssavoto tale nau karika aluse. <sup>26</sup> Eghe nnaala va marova eghaa nimmarikana, me etam ghaa nioneoneaa, tale ararina atea Karisto, aue elau ekapa asease ghinna atoa eIjip, poli ghe aatoka matane tale aipolipoli eteva auena. <sup>27</sup> Tale niaikaaiaa Moses ghe kasu vulila eIjip, poli karika ghe matautaala sessaiaane kingi eteva, nongina va arova ghe tarala lo ateva karika ita rooroo tani taraia, me ghe ratila tani mene oghiaa lao. <sup>28</sup> Tale niaikaaiaa ghe gheleila uunguaa Pasova ngateva, me ghe auliaala laghe atoka saela rae tapaa ngatamaniira, me ensolo tale nimate ateva ghe tam uvi ematela natuira mua atoa taita aIsraeli etoa.

<sup>29</sup> Tale niaikaaiaa aIsraeli etoa laghe kasu lon-

---

**11:22:** Aitiutiu 50:24-25; Eks 13:19.      **11:23:** Eks 1:22; 2:2.

**11:28:** Eks 12:21-30.      **11:29:** Eks 14:21-31.

gotila paa manu eteva la ghaseasea va eRet Sii etana, nongina va elae. Nau aljipi etoa vara laghe toonga tani kasu tee, manu eteva ghe arropilala.

<sup>30</sup> Tale niaikaaiaa aivativati etoa eJeriko laghe katuula nau aIsraeli etoa laghe kasu taliaala erooroo ghaitu nau.

<sup>31</sup> Tale niaikaaiaa Reiab aipae taita ia karika ghe matela tee lo atoa laghe tam nongonongo usilaa God, poli ghe aitaraala kapuira tau lloso atoa aIsraeli etoa.

<sup>32</sup> Vaalua, sa ateva amene aulieinia? Karika oroi naughu tani mene auliaa Gidion, Barak, Samson, Jepta, Deivit, Samuel me propete atoa.

<sup>33</sup> Tale niaikaaiaa laghe uviuvi patunganue namu ngatoa me laghe ghaaghaaila, laghe gheelei niaisakei tale uunguaa nighulughuluena, me laghe ghaaghaa saa voto God ghe auliaa ta nge-taira tale inangari nialokoi. Laghe gheelei runga paaira laeoni etoa, <sup>34</sup> laghe aapala kura atoa ataataailiila, laghe saasaanga tale baenata. Arongona ta saghuighuina ila, me laghe mene sarasarakana, me laghe tiitingina asarasarakana tale niaiuvii, me laghe uviuvi tau ngai ssateeira atoa ativuu ila. <sup>35</sup> Tale niaikaaiaa, vause atoa kapuira atoa matena ila laghe mene totu saela tale nimate. Katoa laghe tam aaloanna va la nim karavusu, laghe matemate tale nimate mmarikanaaili, poli laghe aloannaaili va la mene totu tale lo ateva nitotu masinaaili ia. <sup>36</sup> Mene

---

**11:30:** Jos 6:12-21. **11:31:** Jos 2:1-21; 6:21-25; Jms 2:25.

**11:32:** Aitoi 6:11-8:32; 4:6-5:31; 13:2-16:31; 11:1-12:7. **11:33:** Den 6:1-2. **11:34:** Den 3:23-27. **11:35:** 1 Ki 17:17-24; 2 Ki 4:25-37. **11:36:** 1 Ki 22:26-27; Jer 20:2; 37:15; 38:6.

katoa laghe aauliaa teeila asease inangari etoa me laghe uuetaila. Katoa laghe aatoka sene ta ngetaira me laghe laolaoainila tale ale mata voovoo. <sup>37</sup> Laghe osaosa amatela tale atu, laghe soosoo eghaluevilauila, laghe uviuvi ematela tale baenata. Laghe kasukasu see, laghe aasae viliki sipipi me meemee, karika righi peiira, taumattu ngatoa karika laghe gheelei righi masi voto ta ngetaira, laghe gheelei saasakieinila. <sup>38</sup> Kosa ateva karika ghe maamasina ta ngetaira. Laghe aso kasukasu see nongina va lo atoa karika va righi liuira, laghe tokatoka tale voto karika righi taumattu ta ngetana me tale motouru etoa, me tale lienga atoa me liu etoa tale kosa.

<sup>39</sup> Ila oia lo atoa laghe ghaala niaruaa ta God poli tale uneira niaikaaiiaa, arongona ta karika teva ta ngetaira ghe ghaala voto laghe aulia ngamuemue alokoila tale inangari nialokoi. <sup>40</sup> God ang ghe loela kasina voto masinaaili ta ngetaita, me karika va lo atoa akasina nonga, ta ita akapa aitaaua aue ita ghaa.

## 12

*Iesu, aitiutiu ia me aighelei eghulughuluena niaikaaiia ia*

<sup>1</sup> Ita taatara oroieili taumattu ngatoa maa-mauluaaira eaapasunga vaalua malloeana niaikaaiiaa. Liuna avalua o ita ilou tale ia o niaikarati eteae emua ta ngetaita me ita rau mene mangoovulua. Ita ghaa velu righi asease voto maamatana, me ssavoto tee erau kavili

rungainita. <sup>2</sup> Nau etoa ita tani taatara lao ta Iesu, poli ia aitiutiua ia me aighelei eghulughuluena niaikaaiaa ia. Karika ghe nnaala nipalata tale ia o ase nimate ateva tale aikotoo, ta ghe nnaala nimasimasi eteva aue eghaaia me etoka etana nau ekapa atoa. Me ghaine etokatoka tale pai muenna ativilau tale aitokatokane ateva God.

*God eparuparu natuna atoa*

<sup>3</sup> Am nim nnaa voto sesaaili tau ssavoto atoa laghe gheleila etana, me ghe tingina akorokoron-ganala etana. Karika laghe maamasieinia me laghe gheeleia va eghaa voto maate. Liuna avalua o me am rau mene mangoo me am sio asoasoa.

<sup>4</sup> Tale uneimim niaissarakaa tee ssavoto ateva, karika toa laghe uvi emateam. <sup>5</sup> Me koti ngam ghe kkaluaala isaa o inangari niaisausiaa eauliaa etaimim va am natuna am.

“Natughu, urau mene nnaa va niparuparu eteae kanna ia Vau ngepona peisaane ia, me urau mene sio asoasoa nau eloeloeo.

<sup>6</sup> Poli Vau ngepona ateva eparuparu lo atoa eaaielousiangailiila me eattara matane lo ateva taumattu eghaaghaaia nongina va natuna ia.”

<sup>7</sup> Liuna avalua o me am tingina asarasarakana tale niparuparu aanasa, poli God egheeleiem nongina va natuna am. Poli sa ateva aliki tamane etam paruparua? <sup>8</sup> God eparuparu ekapa natuna atoa. Arova etam parula, karika va tani natuna ila, ta nim aliki tale kosa ateva oia. <sup>9</sup> Nim nongina tamaita tuunga atoa la paruparuta, me ita

oneoneainila. Vaalua me karika ita roo tani tau velu Tamaira ateva kapuita spiriti etoa eparuta me etau mae maulue ateva me aue ita toka? <sup>10</sup> Tamaita atoa tale kosa ateva oia la paruparuta tale nau karika aluse, tale aaloannaaira; me God eparuparuta tani sausita tale masi nitoka nau etoa egheeleita va ita manga nongina ia manga ia. <sup>11</sup> Karika ita masimasi nau la tautau mae niparuparu mmarikanaaili tani ghaa oghita tale sesa salana. Me marova ita kila tani nongo usilaa nau la paruparuta, aue ita ghelei voto ghulughuluena me aue ita toka tale luei.

<sup>12</sup> Poli ngam ghe maomaonala tale niaikarati eteae, liuna avalua o me am gheleiem me am mene sarasarakana. <sup>13</sup> Am toka tale ghulughuluena atikirighi salana me aue am roo tani saanga, me voto atoa la ghelei emaomaonaiem, karika la rooroo tani gheleiem va erauem.

<sup>14</sup> Am tootoonga tani toka tee taumattu ngakapa atoa tale luei, me am toka tale maulue manga. Arova teva maamaulueaane karika manga, karika aue etara Vau ngepona ateva. <sup>15</sup> Am aipanipaniaa nonga ta am rau katuu vulu nonga maamasinaane ateva God. Karika teva etaimim emene nongina natu ngai erighi kaaleaili ia epiipinosa sae me eghelei oroieili voto sesa, me oroi taumattu la tam raarangisana ta matane God. <sup>16</sup> Karika teva taumattu emene aimuli tee uunguaa niailai salosalooa me karika eoneoneaa voto atoa manga ila, nongina Iso, ghe nim aikolikoliaala saa voto ia ghe rooroo tani

---

**12:11:** Jms 3:17-18. **12:12:** Ais 35:3. **12:13:** Nitoka 4:26.

**12:16:** Aitiutiu 25:29-34.

ghaa poli ia mue ia, tale nim tuku nginana arighi.  
<sup>17</sup> Am nim nnaa va nau Iso ang ghe gheleila isaa o voto, me emulina ang ghe mene aaloanna niarangise me God ghe ratila. Iso karika ghe roola tani aikolikoliaa isaa o voto poli karika ghe nna ngaioghioghia ngakoronnala arongona ta ghe ngangala poi.

*Ita ghe mae sio ta Jerusalem ngepona liu eteva*

<sup>18</sup> Karika am ghe mae tale motouru eteva eSaenae ita rooroo tani posoa, karika teae kura eramerame, o righi saurrom me urukookoo, o teva ttasi vaoo, <sup>19</sup> o lingi taue ateva me lingi ngalo ateva esamasama, me lo atoa laghe nongoala, laghe tam aloannala tani mene nongo righi inangari. <sup>20</sup> Poli karika angila ghe rooroo tani nongo me tingina akorokorongana tale saa llo God ghe auliaala va, tee marova teva ghaata kkena enim tuli motouru eteva, la tani uvi ematea. <sup>21</sup> Saa voto laghe tarala ghe ghelei ematautulala me Moses ghe uela va, “Ngaghi reterete tee nimatautu.” <sup>22</sup> Me, ngam ghe mae sio tale motouru eteva la aseasea va Saeon, ia o masaliki taatara atea masalikina ia God ateva tokatoka liu ia, ia o Jerusalem ngepona liu eteva, me ta kapuna en-solo atoa oroianaaaili ila laghe mae sio tani masimasi eitauaa. <sup>23</sup> Ngam ghe mae sio tale kinatama nivelu eitaua ngateae ta lo atoa nongina va natuna mata ngemue ila God, me ila la masimasiaili poli ila arariira isaa epona liu, me

---

**12:17:** Aitiutiu 27:30-40.    **12:18:** Eks 19:16-20; Diut 4:11-12.

**12:19:** Eks 20:18-21; Diut 5:22-27.    **12:20:** Eks 19:12-13.

**12:21:** Diut 9:19.

ngam ghe mae sio ta God, ia tau ngai ghelei niaisakei ia ta ila akapaaili taumattu ngatoa, me ta ghulughuluena tee atoa laghe matela me God ghe amangailala. <sup>24</sup> Me Iesu etiitingina elome etaita me God tale ouna ateva inangari niaippooa ngaitauaa, poli raena ateva elaulau raena ateva Eibol me eaaulia ngaotu oroieili masi voto.

<sup>25</sup> Am nna ngamasina, me am rau mene rati tani nongo usilaa God nau eaaippooaa. Katoa laghe nongo vuluela nau ghe aauliaa voto etaira tale kosa ateva oia, me karika laghe rooroo tani ilou eisulia. Liuna avalua o me karika poi aue ita rooroo tani ilou eisulia marova ita tam nongo usilaa inangarina God epona liu. <sup>26</sup> Lingi ngalona ateva God ghe gheleila kosa ateva ghe rukeiela, me tale isaa oia nau ang ghe aulia ngalokoila tale inangari nialokoi va, “Aue amene ruke kosa ateva ghaluene me epona liu tee.” <sup>27</sup> Isaa o mata nginangari va “ghaluene” eaaulia ngamasa-likangaili va aue eghaa velu voto erooroo tani ruke, malloeana va llo voto ghe gheleila, poli ghe aloannala va llo voto karika la rooroo tani ruke, isaa nonga o voto aue etoka.

<sup>28</sup> Liuna avalua o me ita kaili emasina ta God, poli ita ghaaghaa ararimangali eteva karika erooroo tani rukeia, aue ita kkauaa God tale ase salana erooroo tani apasunga nioneoneaa me nimatautu ta God. <sup>29</sup> Poli kapuita God ateva konnaaili va ia nongina “kura atea etuuturungi ekapaaili voto atoa.”

---

**12:24:** Hib 8:6; Aitiutiu 4:10.      **12:25:** Hib 2:1-3; 10:26-29.

**12:26:** Ag 2:6.      **12:29:** Diut 4:24; 9:3.



# 13

## *Niuungu tani amasimasi God*

<sup>1</sup> Am rau mene ruu tani aielousi nongina va tue me nenga am. <sup>2</sup> Am rau mene kkaluaa tani aikoloa ativuu etoa, poli katoa laghe gheeleei evalua o me karika laghe kilakila va laghe aikoloaala ensolo atoa. <sup>3</sup> Am nnaa lo atoa tale ale mata voovoo, arova nongina va am tee am tokatoka tale ale mata voovoo teeila, me tee lo atoa karika la gheeleei masina etaira, nongina va am tee am ghaaghaa nimmarikana.

<sup>4</sup> Am akapaaili am oneoneaa nilai eteae, me lailai elua komo tellaai ekomoirarua nonga ia. Ta poli God aue egheleei niaisakei ta lo ateva taumattu lailai ia me emene laa ghaailai see, me lo atoa la lailai sari maneira atoa mene katoa. <sup>5</sup> Am alekalekaiem tale uunguaa niaielousiaa viliki veu, me am masimasiaa saa voto ngam ghe ghaala isaa etaimim. Poli God ghe uela va,  
 “Karika aue akasu vulio;  
 me karika aue akkaluaa poio.”

<sup>6</sup> Mausina avalua o me ita atoka tuutuliita ta God me ita ue ta taumattu ngatoa va,  
 “Vau ngepona ateva tau ngai sausighi ia,  
 karika aue amatauta  
 saa righi voto teva taumattu eanna tani  
 gheleei etaghi.”

<sup>7</sup> Am rau mene kkaluaa lo atoa laghe mueueinam, ila laghe aaulia ngaotu inangarina ateva God etaimim. Am nnaa tee vaalua toka-tokaaira me matemateaaira, me am tootoonga

tani ghaa ia o ase niaikaai ngateva nongina ila. <sup>8</sup> Iesu Karisto karika ghe aikolikoliaa poi nau too ang ghe lao sio, nau ghaine, me nau too emaemae.

<sup>9</sup> Am rau mene tau velu asease niapasunga ngatoa kamena ila va la katulaa veluem tale masi salana atikirighi. Emaamasina tale urunguita ateva tani ghaa sarasarakana tale maamasinaane God, me karika va tani usilaa inangari tale uunguaa inana la gheelei aiaavusuvusuena etana, ta poli lo atoa la usilaa isaa o inangari karika esaasausila.

<sup>10</sup> Ouna ase liu nighelei aiaavusuvusuena etokatoka etaita, me pristi etoa la uungu tale ale kandisi eteva manga ia karika la rooroo tani ghaa inana tale ia o voto ateva. <sup>11</sup> Nau namu ngateva ta pristi etoa eghaaghaa raeira ghaata kkena atoa me esosoa elome tale rum atiulu mangaaili ia tani ghelei aiaavusuvusuena tani ghaa velu kaluira ssavoto taumattu ngatoa, me ghaata kkena akapa ateva laghe ghooainia eleka, me laghe ghoa tungitungia. <sup>12</sup> Mausina avalua o me Iesu tee ghe matela eleka tale masaliki taatara atea, tani ghelei eraarangisana kaluira ssavoto taumattu ngatoa tale raena ateva. <sup>13</sup> Liuna avalua o me ita tee ita ghoa tee Iesu eleka me ita ghaa nipalata nongina laghe ghelei teeiela. <sup>14</sup> Poli tale kosa ateva oia karika teae masaliki taatara erooroo tani toka nau ekapa atoa, ita toitoi ia o ouna atea masaliki taatara va emae.

<sup>15</sup> Liuna avalua o tale uunguaane Iesu ita toka kaakaueinia nau ekapa atoa tani ghelei arova

---

**13:9:** Rom 14:17.    **13:11:** Lev 16:27.    **13:12:** Jon 19:17.

**13:13:** Hib 12:2.    **13:14:** Hib 11:10, 16; 12:22.    **13:15:** Sams 50:14, 23.

uneita aiaavusuvusuena nitau sae ta God. Me nilooloo sae me nitau sae ita auliaa ta paaita nongina va kaluita aiaavusuvusuena ta God nau ita auliaa ararina atae. <sup>16</sup> Am rau mene kkaluaa tani ghelei masi voto me tani parruu mene kateva kateva, poli God emasimasiaa ia o ase aiaavusuvusuena.

<sup>17</sup> Am nongo usilaa lo atoa la muemueinam me am ghelei saa voto la auliaa. Poli ila la aaitarainiem, me aue la ghauliaa ta God vaalua aaitaraaira etaimim. Am nongo usilainila, me aue nimasimasi elutu tale uunguaaira. Arova karika, aue la ghelei uunguaaira tale nialousiusi me karika aue la roo tani sausiem.

<sup>18</sup> Am rau mene ruu tani looloo sae poli mausi-imami, poli ami kilakila va nannaaimami masalikeaaili va karika ami ghe ghelei righi sesa voto, poli nau ekapa atoa ami aloanna tani ghelei voto masina. <sup>19</sup> Tale urunguitanighi ekapaaili eteva akookolomiem tani looloo sae va God aue esungi parasieghi atu etaimim.

### *Airuuruu eteva nilooloo sae*

<sup>20-21</sup> Alooloo sae va God, ia etautau luei, aue etau aatu isaa akapaaili masi voto atoa me am rooroo tani ghelei voto eaaloanna. God ghe totula Vauita ateva Iesu Karisto tale nimate, ia kinatama aitoitoi ia ta sipsipi etoa, poli tale raena ateva tale matemateaane. Raena ateva ghe tiuaala niaippooa ngaitaua ngateva aue etoka nau ekapa atoa. Alooloo sae va aue God eghelei etaita saa voto emaamasina etana, tale uunguaa Iesu

---

**13:16:** Plp 4:18. **13:17:** 1 Tes 5:12. **13:18:** Apos 24:16; 2 Ko 1:12. **13:20-21:** Jer 32:40; Esik 37:26; 1 Pita 2:25.

Karisto, me ta ngetana nitau sae nau ekapa atoa. Koronna.

*Airuuna inangari tale uru ngai etikirighi*

<sup>22</sup> Akookolomiem, masi kapughu etoa, tani nna ngamasina isaa o inangari niaisausiaa aghe pitila tale uru ngai etikirighi oia karika aluse ia.

<sup>23</sup> Aghaaloannaiem tani kila va kapuita ateva ta Timoti ang ghe kupi ghoa mae tale ale mata voovoo. Arova emae parasi, aue aghaaia me angalu mae taraiem.

<sup>24</sup> Am taula masimasiaaimami ta lo atoa la mue-mueinam me tee ta kapuna taumattu ngatoa God. Kapuita atoa eItali la suu aatu sio masimasiaaira etaimim.

<sup>25</sup> Alooloo sae va aue maamasinaane God etoka etaimim akapa.

**Mussau-Emira Bible**  
**Portions of the Holy Bible in the Mussau-Emira**  
**Language of Papua New Guinea**  
**Sampela hap Buk Baibel long tokples Mussau-Emira**  
**long Niugini**

copyright © 2006, 2008, 2013, 2016, 2018 Wycliffe Bible Translators, Inc.

Language: Mussau-Emira

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-09

---

PDF generated using Haiola and XeLaTeX on 11 Nov 2022 from source files dated 30 Nov 2021

9cad943-c245-5983-a663-5b2655bf0449